



LUTA BA MODELU AGRO-ALIMENTÁR ALTERNATIVU IDA

Avansu husi prosesu globalizasaun no ekonomia nia internasionalizasaun progresiva kontribui mós atu hamenus nasaun sira-nia kapasidade atu elabora no implementa sira-nia polítika agro-alimentár. Iha ámbito diskusaun ida-ne'e, soberania ai-han mosu nu'udar abordajen foun ne'ebé manán terenu polítiku dezde tinan 1990, ho ajuda husi movimentu sosiál luan lubuk ida, ONG, rede no organizasaun sira seluk iha mundu tomak. Abordajen ne'e tama ba debate liuhusi Via Kampezina, abordajen soberania ai-han hametin nia pozisaun hanesan modelu ne'ebé kontrapõin teze neoliberal, reivindika direitu soberanu atu defini polítika ai-han no inklui direitu ba ai-han.

SOBERANIA AI-HAN

Soberania ai-han mak direitu povu nian ba ai-han ne'ebé nutritivu no adekuaudu tuir kultura, asesível, ne'ebé prodús tuir maneira sustentável no ekolójika, no nia direitu atu foti desizaun kona-ba nia sistema ai-han no produsaun nian rasik. Abordajen ne'e tau sira ne'ebé prodús, fahe no konsome ai-han iha sistema no polítika ai-han nian nia laran, iha ezijénsia merkadu no empreza sira nia leten.

Deklarasaun Nyélény nian, Mali, 2007

ELEMENTU-XAVE SOBERANIA AI-HAN NIAN

Asesu ba rai no rekursu naturál sira seluk, nomós folin justu ba agrikultór sira, mak fatór sentrá balun atu hetan soberania ai-han. Abordajen ba soberania ai-han hatete katak asesu ba ai-han hanesan kestaun seguransa no soberania nasonál. Tan razaun ida-ne'e, sustenta katak kestaun sira ne'ebé relasiona ho agrikultura no ai-han tenke diskute no labele haree iha akordu komersiál sirania laran, ne'ebé estabese iha ámbito Organizasaun Mundiál Komersiu (OMC) nian, no akordu rejionál no bilaterál sira seluk nia laran. Iha tinan 1996, paralelamente, iha Konferénsia Mundiál Ai-han nian ne'ebé realiza iha Roma, organizasaun no movimentu sosiál atus-ba-atus hetan konsensu ida kona-ba elementu-xave prinsipál ne'ebé presiza ba modelu alternativu sistema agro-alimentár nian:

ELEMENTU-XAVE SOBERANIA AI-HAN NIAN

- Reforsa kapasidade família rural sira, inklui popoulasaun indijena, feto no foin-sa'e sira, no sira-nia sistema ai-han lokál nian.
- Adota medida sira atu halakon konsentrasaun rikeza, liuliu liuhusi promosaun Reforma Agrária.
- Agrikultura no sistema produsaun ai-han ne'ebé bazeia ba rekursu la-renovável no ne'ebé afeta ho maneira negativa meu ambiente tenke altera ba modelu ne'ebé bazeia ba prinsipiu agroekolojia nian.
- Presiza reforsa no haklean partisipasaun sosiedade sivil iha nível sira hotu no governu adota mekanizmu ne'ebé bele garante polítika nia transparénsia no prestasaun de kontas.
- Labele kosidera ai-han hanesan merkadoria, tanba sira-nia dimensaun sosiál no kulturál.
- Labele tau agrikultura no ai-han hamutuk iha ámbito OMC no akordu komersiál sira seluk.
- Lei Internasionál tenke garante Direitu Umanu ba Ai-han.

Fonte: Deklarasaun Finál Fórum Sosiedade Sivil ba Seguransa Ai-han nian, Roma, 1996

INTER-RELAUN ENTRE SEGURANSA AI-HAN NO NUTRISAUN, SOBERANIA AI-HAN NO DIREITU BA AI-HAN

Iha mundu globalizadu ida nia laran, hetan situasaun seguransa ai-han no nutrisaun ba ema hotu ho maneira ida permanente signifika katak tenke haree ba kestaun soberania no direitus umanus.

Ba governu no organisaun internasionál barak, komérsiu internasionál no merkadu sira nia funsionamentu livre mak solusaun atu rezolve hamlaha no inseguransa ai-han. Maibé, istória hatudu katak ne'e la'os tebes, tanba komérsiu nia liberalizasaun aumenta liután diferensa makaas husi nasaun riku no nasaun ki'ak no problema hamlaha nian. Husi sorin seluk, ita labele obtein ai-han liuhusi kualkér dalan ida.

Fundamentál katak produsaun ai-han bele sosiál no sustentável ba ambiente no katak nia komersializasaun bele realiza ho maneira ida ne'beé loos. Soberania ai-han no direitu ba ai-han mak ai-rin rua ne'ebé fundamentál atu hetan situasaun seguransa ai-han no nutrisaun ne'ebé naruk.



SAIDA MAK ITA BELE HALO?

HAFORSA AGROEKOLOJIA

Modelu produsaun agrikula dominante ne'ebé bazeia ba agrikultura intensiva no monokultura ba esportasaun hasa'e kondisaun hamlaha nian iha mundu: tuir pontudevista ekonómiku no sosiál, kria dezempregu barak liu no promove konsentrasaun rikeza; husi pontudevista ambientál, uza kuantidade produktu kímiku ne'ebé boot no estraga rekursu natural sira. Tan ne'e, modelu produsaun agroekolójiku mak alternativa sosiál no ambientál sustentável. Modelu ida ne'e bazeia ba matenek tradisionál no ba esperiénsia ne'ebé agrikultór sira halibur hamutuk atu aplika prátika agrikola ekolójika. Rede kolaborasaun no solidariedade entre agrikultór sira permite jestaun rekursus endójenu sira-nian (inklui rai, be'e, fini, biodiversidade) efisiente liu no ne'ebé la halo aat ba ambiente no ba jersaun oin mai. Signifika katak tenke pratika agrikultura ida diversifikada no besik (produu sira ne'ebé lahanesan no rai pedasuk besik família, eskola no comunidade sira), mantein movimentu produsaun ne'ebé la pára (ai-han ne'ebé prodús durante tinan nia laran tuir nia tempu atu kuda ai-han), uza prátika agrikula ne'ebé adapta lokalmente (kultura rotasaun, konsersasaun rai, kaptasaun no jestaun be'e nian, kompostu orgániku, fini no variedade tradisionál no la'os OGM – Organizmu sira Jenetikamente Modifikadu).

PRIORIDADE BA MERKADU LOKÁI SIRA

Hakbesik entre produsaun no konsumu, liuhusi sirkuitu kiik komersializasaun nian, hamenus kustu tranzasaun no aumenta oportunidade atu faan ba agrikultór sira ho folin ne'ebé justu liu. Ezemplu balun kona-ba estratéjia inkluzaan agrikultór sira iha merkadu no hakbesik sira ba konsumidór mak organisaun rede lokál komersializasaun (porezemplu, liuhusi asosiasaun no koperativa produtór no konsumidór nian), promosaun fa'an direta (porezemplu, liuhusi feira lokál ne'ebé halo'o bebeik iha semana-semama ka fulan-fulan ka liuhusi fahe produktu sira ba konsumidór) kompra institusionál sira liuhusi governu ba produtór (porezemplu, atu abastese programa ai-han eskolár ka kantina instituisaun pública sira-nian), aposta iha estratéjia marketing no valorizasaun produktu sira-nian (transformasaun eskala kiik nian, dezvoltimentu bote ai-han nian).

Autór: ATUAR – Associação para a Cooperação e o Desenvolvimento. Portugal (<http://www.actuar-acd.org/>)

Publikasaun ne'e produzir ho apoiu husi União Europeia. Ho konteudu eksklusiva ba responsabilidade HASATIL no mos labele, iha kasu ruma, konsidera nudar expresaun ba posisaun União Europeia"

Projeto Assistencia Técnica no Háfora a Kompeténsia HASATIL em an no Organizaun: Sisa Saade Sivil ba Dezenvolvimentu Rural iha Timor Leste (FED/2012/204-340)

